

周氏醫學啟書

周氏醫學啟書
PDG

本艸經疏卷十

艸部下品之上

總六十二種今疏其要者一十六種

附子

半夏

大黃

葶藶

桔梗

艸蒿

旋復花

藜蘆

射干

常山

甘遂

白欬

白及

大戟

貫眾

羊躑躅

附子味辛甘溫大熱有大毒主風寒欬逆邪氣溫中金
瘡破癥堅積聚血瘕寒溼踈蹇拘攣膝痛腳疼冷弱不
能行步腰脊風寒心腹冷痛霍亂轉筋下痢赤白堅肌
骨強陰又墮胎爲百藥長冬月採爲附子春採爲烏頭

忌敗汁得蜀椒食鹽可引之下行地膽爲之使
惡蜈蚣畏防風黑豆甘艸黃耆人參童便犀角

疏附子全稟地中火土燥烈之氣而兼得乎天之熱
氣故其氣味皆大辛大熱微兼甘苦而有火毒氣厚
味薄陽中之陰降多升少浮中沈無所不至入手厥
陰命門手少陽三焦兼入足少陰太陰經其性走而
不守得甘艸則性緩得肉桂則補命門本經主風寒
欬逆邪氣寒溼踈躄拘攣膝痛腳疼冷弱不能行步
以此諸病皆由風寒溼三邪客之所致也邪客上焦
則欬逆邪客下焦則成踈躄拘攣膝痛腳疼冷弱不
能行步此藥性大熱而善走故亦善除風寒溼三邪
三邪祛則諸證自瘳矣癥堅積聚血瘀皆血分虛寒

凝而不行所成血得熱則行故能療之其主金瘡亦
謂金瘡爲風寒所鬱擊血瘀不活之證而非血流不
止之金瘡也別錄又主腰脊風寒腳氣冷弱心腹冷
痛及脾虛寒客中焦爲霍亂客下焦肝腎之分爲轉
筋借諸補氣藥則溫中補血藥則強陰堅肌骨火能
消物氣性熱極入血善行故善墜胎爲百藥長引參
朮黃耆茯苓則溫煖脾胃除脾溼祛腎寒補下焦陽
虛佐之以桂則除臟腑沈寒三焦厥逆溼滯腹痛胃
寒虬動氣虛經閉補陽虛散虛壅亦可入足太陽少
陰故治督脈爲病脊強而厥督脈夾脊而上並足太
陽膀胱經膀胱者腎之府故主之也天雄烏頭側子

本是同生第其形質有異老嫩或殊大熱大毒則未始有別也

主治參互

附子得生乾薑桂枝主傷寒直中陰經溫中散寒而能出汗 佐人參兼肉桂五味子則補命門相火不足回陽有神 得人參肉桂治元氣虛人暴寒之氣入腹腹痛作泄完穀不化小水不禁佐白朮爲除寒溼之聖藥 得黃耆人參炙甘草芍藥橘皮五味子主癰疽潰後去膿血過多以致飲食不進惡心欲嘔飲食不化不生肌肉亦主久漏冷瘡 得人參白芍藥炙甘草芍藥仁橘皮主小兒慢驚加蓮肉白藕豆

則治吐瀉不止 得朮桂牛膝木瓜橘皮主寒疝痛
極立止 得朮木瓜石斛萆薢薏苡仁橘皮茯苓治
風溼麻痺腫痛腳氣之無熱證者輒驗 得人參橘
皮主久病嘔噦反胃虛而無熱者良 經曰腎苦燥
急食辛以潤之附子同肉桂之辛入八味丸以潤腎
燥陽虛無熱證者宜之

簡誤

附子既稟地二之火氣兼得乎天之熱氣以生是陰
陽湊合無非火熱爲性氣味皆然毒可知已論其性
質之所能乃是退陰寒益陽火兼除寒溼之要藥引
補氣血藥入命門益相火之上劑若非陰寒寒溼陽

虛氣弱之病而誤用之於陰虛內熱血液衰少傷寒
溫病熱病陽厥等證靡不立斃謹列其害如左醫師
司命宜詳玩而深鑒之亦生人之大幸也傷寒陽厥
其外證雖與陰厥相類而其內實不相侔何者陽厥
之病若係傷寒溫疫其先必發熱頭疼口渴其後雖
頭不疼而表熱已除然必面赤額紅二便不利小便
必赤或短少是其候也此當下之病也產後血虛角
弓反張病名曰瘓瘓者勁也是去血過多陰氣暴虛
陰虛生內熱熱則生風故外兼現乎風證其實乃陰
血不足無以榮養於筋所致足厥陰肝家大虛之候
此宜益陰補血清熱則愈也故凡病人一見內熱口

乾咽乾口渴渴欲引飲咳嗽多痰煩躁五心煩熱骨蒸勞熱惡寒陰虛內熱外寒虛火上攻齒痛脾陰不足以致飲食無味小便黃赤短澀及不利大便不通或燥結腹內覺熱悶喜飲冷漿及鮮果畏火及日光兼畏人聲木聲虛陽易興夢洩不止產後發熱產後血行不止及惡瘡臭穢小產增寒壯熱中暑厥暈陰虛頭暈中暑暴泄利下如火赤白滯下小兒中暑傷食作泄小便短赤口渴思飲血虛腹痛按之卽止火炎欲嘔外類反胃而惡熱焦煩得寒暫止中熱腹中絞痛中暑霍亂吐瀉或乾霍亂或久瘧寒熱並盛或赤白濁赤白淋尿血便血血崩吐衄齒衄舌上出血

目昏神短耳鳴盜汗汗血多汗惡熱老人精絕陽痿
少年縱慾傷精以致陰精不守精滑腦漏婦人血枯
無子血枯經閉腎虛小便餘瀝血虛大便燥結陰虛
口苦舌乾心經有熱夢寐紛紜下部溼熱行履重滯
溼熱痿痺溼熱作泄溼熱腳氣小兒急驚內熱痘瘡
乾焦黑陷痘瘡火閉不出痘瘡皮薄嬌紅痘瘡因熱
咬牙痘瘡挾熱下利痘瘡餘毒生癰中風僵仆不語
中風口眼歪邪中風語言蹇澀中風半身不遂中風
痰多神昏一切癰疽未潰金瘡失血發瘕血虛頭痛
偏頭風痛上來內外男婦小兒共七十餘證病屬陰
虛及諸火熱無關陽弱亦非陰寒法所均忌倘誤犯

之輕變爲重重者必死枉害人命此藥居多臨證施治宜謹審之世徒見其投之陽虛之候肺腎本無熱證者服之有起死之殊功而不知其用之陰虛如上諸病亦復下咽莫救故特深著其害以表其非嘗試輕用之藥也業醫君子可不慎諸

半夏味辛平生微寒熟溫有毒主傷寒寒熱心下堅下氣咽喉腫痛頭眩胸脹欬逆腸鳴止汗消心腹胸膈痰熱滿結咳嗽上氣心下急痛堅痞時氣嘔逆消癰腫墮胎療痿黃悅澤面目生令人吐熟令人下用之湯洗令

滑盡

射干爲之使惡皂莢畏雄黃生姜乾姜秦皮鼈甲反烏頭忌羊血海藻飴糖

〔疏〕半夏得土金之氣兼得乎天之燥氣故其味辛平

苦溫火金相搏則辛而有毒潔古謂味辛苦性溫氣
味俱薄沈而降好古謂其辛厚苦輕陽中陰也入足
太陰陽明少陽亦入手少陰經柴胡爲之使辛溫善
散故主傷寒邪在表裏之間往來寒熱苦善下泄邪
在胸中則心下堅胸脹欬逆邪在上焦則頭眩邪在
少陰則咽喉腫痛別錄亦謂其消心腹胸膈痰熱滿
結欬逆上氣心下急痛堅痞時氣嘔逆亦皆邪在上
焦胸中之所致故悉主之也中焦者足太陰之所治
也有溼有熱清濁不分則腸鳴溼熱勝則自汗入足
太陰故并主之辛能散結故消癰腫脾家溼熱則面
色痿黃實脾分水燥溼則前證俱除面目因而滑澤

矣辛溫有毒故墮胎也

主治參互

張仲景傷寒論小結胸痛正在心下按之則痛脈浮而滑者小陷胸湯主之半夏半升黃連一兩栝樓實大者一箇水六升先煮栝樓至三升去滓內二味煮取二升分三服 又治少陰咽痛生瘡不能言語聲不出者苦酒湯主之半夏七枚打碎雞子一枚頭開一竅去黃納苦酒令小滿入半夏在內以環子坐於炭火上煎三沸去滓置盃中時時嚥之極驗未瘥更作 金匱要略治支飲作嘔嘔家本渴不渴者心下有支飲也或似喘不喘似嘔不嘔似噦不噦心下憤

償並宜小半夏湯用半夏泡七次一升生薑半升水
七升煮一升五合分溫服 又治嘔噦眩悸穀不得
下半夏加茯苓湯半夏一升生薑半斤茯苓三兩切
以水七升煎一升半分溫服之 又心下悸忪半夏
麻黃丸半夏麻黃等分爲末蜜丸小豆大每服三十
丸日三 又嘔吐反胃大半夏湯半夏三升人參三
兩白蜜一升水一斗二升和揚之一百二十遍煮取
三升半溫服一升日再服亦治脇間支飲 又張仲
景方治黃疸喘滿小便自利不可除熱者用半夏半
斤生薑半斤水七升煮一升五合分再服有一人氣
結而死心下暖以此少許入口其人遂活 潔古活

法機要方風痰頭暈嘔逆目眩面青黃色脈弦者水
煮金花丸用生半夏生天南星寒水石煨各一兩天
麻半兩雄黃二錢小麥麴三兩爲末水和成餅水煮
浮起漉出搗丸梧子大每服五十九薑湯下極效亦
治風痰咳嗽二便不通風痰頭痛 又治風痰喘逆
兀兀欲吐眩暈欲倒半夏一兩雄黃三錢爲末薑汁
浸蒸餅丸梧子大每服三十九薑湯下已吐者加檳
榔 又治溼痰咳嗽面黃體重嗜臥兼食不消脈緩
者白朮丸用半夏南星各一兩白朮一兩半爲末薄
糊丸梧子大每服五十九薑湯下 又治氣痰咳嗽
面白氣促洒淅惡寒愁憂不樂脈澹者玉粉丸用半

夏南星各一兩官桂半兩爲末糊丸梧子大每服五
十丸薑湯下 和劑局方治停痰畱飲胸膈滿悶氣
短惡心飲食不下或吐痰水茯苓半夏湯用半夏泡
五兩茯苓三兩每服四錢薑七片水一鍾半煎七分
甚捷徑 又搜風化痰安神定志利頭目辰砂化痰
丸用半夏麴三兩天南星炮一兩辰砂枯礬各半兩
爲末薑汁打糊丸梧子大每服三十丸食後薑湯下
又治風痰喘急干縉湯用半夏湯洗七箇甘艸炙
皂莢炒各寸許薑三片水一盞煎七分溫服 又治
停痰冷飲嘔逆橘皮半夏湯用半夏水煮熟陳橘皮
各半兩每服四錢生薑七片水二盞煎一盞溫服

又治胃寒噦逆停痰畱飲藿香半夏湯用半夏湯泡炒黃二兩藿香一兩丁皮半兩每服四錢水一盞薑七片煎服 又治伏暑引飲脾胃不和消暑丸用半夏醋煮一斤茯苓半斤生甘艸半斤爲末薑汁麵糊丸梧子大每服五十丸熱湯下 又治中焦痰涎利

咽清頭目進飲食半夏泡七次四兩枯礬一兩爲末薑汁打糊或煮棗肉和丸梧子大每薑湯下十五丸寒痰加丁香五錢熱痰加寒水石煨四兩名玉液丸

御藥院方治膈壅風痰半夏半斤酸漿浸一宿溫湯洗五十遍去惡氣日乾爲末漿水搜作餅日乾再研爲末每五兩入生龍腦一錢以漿水濃腳和丸雞

頭子大紗袋盛避風處陰乾每服一丸好茶或薄荷湯嚼下 葉氏方治風痰溼痰青壺丸半夏一斤天南星八兩各湯泡晒乾爲末薑汁和作餅焙乾入神麴半兩白朮末四兩枳實末二兩薑汁麴糊丸梧子大每服五十丸薑湯下 作三仙丸能化痰利氣斗門方消痰開胃去胸膈壅滯用半夏洗泡焙乾爲末自然薑汁和作餅溼紙裹煨香以熟水二盞同餅二錢入鹽五分煎一盞服之大壓痰毒及酒食傷極驗 機要又治結痰不出語音不清年久者亦宜玉粉丸半夏半兩桂心一字草烏半字爲末薑汁浸蒸餅丸芡實大每服一丸夜臥含嚥 活幼口議治小